



## **Xiinxala Unka Tajaajila Seerlugaa Bamaqaalee Afaan Oromoo Looga Arsii Keessatti**

Daaluu Aabbunii<sup>1\*</sup>, Tashoomaa Balaaynaa<sup>2\*</sup>, Filee Jaalataa<sup>3\*</sup>

Muummee Afaaniifi Ogbarruu Oromoo, Yuunvarsitii Wallaggaa, L.S.P. 395, Naqamtee, Itoophiyaa

### Axereraa

*Barruun kun unka hormaataa bamaqaaleen Afaan Oromoo looga Arsii keessatti tajaajila seerlugaa adda addaa agrisiisuuf qaban xiinxaluu irratti xiyyeefata. Qorannoowwan latilee hortee Afaan Oromoo irratti xiyyeefatan hedduun haajiratan malee, amma qorataan sakatta'uuf yaaletti hanga yoonaa bamaqaaleen Afaan Oromoo looga Arsii keessatti tajaajiila seerlugaa adda addaa agarsiisuuf unki hormaataa isaan qaban maal akka fakkatu qorannoon xiinxalee dhiheesse hinargamne. Kanaafuu, bamaqaaleen Afaan Oromoo Looga Arsii keessatti tajaajila seerlugaa agarsiisuuf unka hormaataa adda addaa akka qaban agarsiisuun guddina Afaanichaatiif gumaacha waan qabuuf mataduree kanarratti qorannoon kun gaggeeffamee jira. Kaayyoon qoranichaa daangaa looga kanaa keessatti unka hormaataa bamaqaalee xiinxalanii agarsiisuu yemmuu ta'u; kaayyoo kana galmaan gahuudhaaf ragaaleen qoranno dhihaatanii xiinxalamen kitaaba "Seera Fuudhaa-Heeruma Oromoo Arsi'i (2000) jedhu keessaa kan funaanaman yoo ta'u; kitaabichi Afaan Oromoo looga Arsiitiin kan barreeffame waan ta'eef, mala iddatteessuu akkayyootiin filatamee jira. Kana malees, qoratichi dubbataa loogichaa waan ta'eef, akka madda ragaa qoranno kanaatti ragaaleen ofii isaatiin dhihaatanis qoranno kana keessatti xiinxalamani jiru. Qorannoon kun saxaxa qoranno ibsaatiin kan dhihaate yemmuu ta'u, ragaaleen akkaataa walfakkeenyaa isaaniitiin mata-duree xixiqqoo jalatti qindaa'anii mala akkamtaatiin erga xiinxalamani booda jechaan ibsamani jiru. Haaluma kanaan, looga Arsii keessatti bamaqaaleen kan akka namummaa, iyyaafanno, mit-beekamoo, ibsamaa, bakkaa, garagalchoo (reflexive) fi fuggisoo (reciprocal) seerluga adda addaa agarsiisuuf unka hormaataa akkamii akka qaban agarsiifamee jira. Fakkeenyaaaf looga Arsii keessatti bamaqaalee namummaa irraa latilee danooma, koorniyaa, gulantaa, maayii matimaafi maayii antimaa mul'isan hundee jechootaa irraa adda baasuun agarsiisuun akka hin danda'amne xiinxalamee jira. Akkasumas, loogicha keessatti bamaqaaleen akeektuu kanneen wantoota qaamaan mul'atan akeekan fakkeenyaaaf (kun/sun, kana/san) fi kanneen qaamaan dubbattoota bira hin jirre akeekan fakkeenyaaaf (kuun, kaan) gargar akka ta'an ragaalee xiinxalamen irraa hubatamee jira. Kana malees, bamaqaan iyyaafanno maqaa nama dhuunfaa bakka bu'u fusii maayii antimaa fakkeenyaaaf, ('eenynyuu) kan fudhatu ta'uun adda bahee jira. Gara biraatiin bamaqaaleen galumsa waliin dubbii (discourse) keessatti iddo maqaalee nama dhuunfaa bu'an 'ebalu fi 'ebalee yemmuu ta'an, bamaqaan 'ebalu jedhamu iddo matimaatti akkuma jirutti (in absolute case) kan taa'u yoo ta'u, iddo antimaaatti garuu fusii {-n} maxxfata. Faallaa kanaan, bamaqaan 'ebalee jedhamu fusii maayii matimaa malee fusii maayii antimaa kan hin maxxfanne ta'uun xiinxalamee jira. Maayiin abbummaa bamaqaa kanaa hudhaa (') + dubbachiftuu dheeraa ('obboleessa + 'ebalee + -ee → 'obboleessa 'ebalee'). Walumaagalatti, Afaan Oromoo keessatti jechootaa bamaqaalee jalatti ramadamanifi akkaataa hormaataa isaanii xiinxalanii adda baasuun guddina xiinqoqa Oromootiif faayidaa waan qabuuf, loogawwan Afaan Oromoo biroo keessattis osoo siritti qorataamee gaarii ta'a.*

### Article Information

#### Article History:

Received: 05-02-2024

Revised: 26-09-2024

Accepted: 15-11-2024

**Jechoota Ijoo:** Afaan Oromoo, bamaqaalee, latilee, tajaajila, unkaalee hortee

\*Qorataa Muummee:

Daaluu Aabbunii

E-mail: [daluabuni@gmail.com](mailto:daluabuni@gmail.com)

## **1. Seensa**

Afaan Oromoo, afaan akka ardi Afrikaatti baay'ina dubbatootaatiin afaanota Arabaafi Hawusaatti aanee jiru ta'ullee, hanga jaarraa 20<sup>ffaa</sup> tti sababa hacuuccaa siyaasaatiin carraa qorattoota biyya keessaatiin qoratamu osoo hin arganne ture. Akka qorannoowwan yeroo dhiyoo mul'isanitti afaanichi loogawwan Dhihaa (Jimma, Wallaggaafi Iluu Abbaa Booraa), Jiddugaleessaa (Tuulamaa), Kaabaa (Wolloofi Raayyaa), Kibbaa (Booranaafi Gujii), Kibba Bahaa (Sikkoofi Mandoo) fi Bahaa (Harargee) jedhamuun qoodamu (Feda, 2015; Teferi, 2019, f. 5; Tilahun, 2018, f. 9). Qorannoон kun looga Kibba Bahaa Oromiyaatti dubbatamu, looga Sikkoofi Mandoo (looga Arsii) irratti xiyyeffatee jira.

Afaan tokko jechoota garee maqaa akaakuu adda addaa akkuma qabu, jechoota iddo maqaalee bu'anii tajaajiluu danda'an (bamaqaalee) ni qabaata. Bamaqaan jecha seera caasaa afaanii keessatti iddo maqaa yookaan gaalee maqaa bu'uudhaan tajaajiluu dha (Crystal, 2008, f. 391; Dixon, 2010, f. 190; Payne, 1997, f. 43; Shopen, 2007, f. 24). Kana malees, Dixon (2012, f. 57) afaan kamiyyuu bamaqaalee of danda'oo mataa gaalee maqaa ta'uu danda'an qabaachuu ibsee jira. Kunis, bamaqaan ijaarama gaalee maqaa keessatti

akkuma maqaatti mataa ta'ee dhaabachuu danda'uu agarsiisa. Dixon (2010) akka jedhutti, yeroo baay'ee bamaqaan namummaa (personal pronoun) ramaddii, lakkofsaafi koorniyaa agarsiistuu ni fayyadama. Qorattoota caasaa bamaqaalee Afaan Oromoo irratti ibsa kennan keessaa Gragg (1976), Hawine (2007), Owens (1985)fi Teferi (2019), Stroomer (1995), Wakweya (2014) maqaa dhahuun ni danda'ama. Isaan keessaa akaakuu bamaqaalee afaanichaati fi unkaalee hortee irratti ibsa bal'aa warri kaahan Teferi (2019) fi Wakweya (2014)dha.

Qorannoо kana gaggeessuuf wantoota qoraticha kakaasan keessaa tokko, qorannoон caasaa bamaqaalee Afaan Oromoo looga Arsii irratti xiyyeffatee gaggeeffame kan hin jirre waan ta'eefi. Qorannoон caasaa afaanii keessatti yaada dimshaashawaa (generalization) bu'aa qorannoо kaa'uudhaaf daangaa adda addummaa loogaa yaada keessa galchuun barbaachisaadha. Chambersiifi Trudgill (2004) fi Adamsiifi Curzan (2012) qorannoон caasaa afaanii gaggeessuu keessatti hawaasa guutumaa guututti looga walfakkaataa dubbatu irratti fulleffachuu fudhatamummaa bu'aa qorannichaatiif bu'a-qabeessa ta'uu ibsuudhaan yaada kana deeggaranii jiru. Wanti qorannoон kana gaggeessuuf qoraticha kakaase inni biraa, Qorannoowwan yeroo dhiyoo caasaa

Afaan Oromoo irratti gaggeeffaman keessaa waa'ee bamaqaalee afaanichaa irratti ibsa bal'aa kan kennan muraasa. Isaanis, Teferi (2019) fi Wakweya (2014) yemmuu ta'an, wal duraaduubaan looga Raayyaafi looga Maccaa irratti kan gaggeessaniidha.

Qorannoowwan kanniin keessatti akaakuun bamaqaalee Afaan Oromoo haadhiyaatan malee, unkaaleen hormaata bamaqaalee afaanichaa tokko tokkoon hin qaacceffamne. Fakkeenyaaaf, Teferi (2019) bamaqaalee namummaa (personal pronoun) irratti malee, bamaqaalee hafan (bamaqaalee akeektuu, iyyaafannoo, garagachoo, ofiifiifi mit-beekamaa) irratti unkaalee hormaataa lakkofsa, koorniyaafi maayiwwan adda addaa mul'isan hin ibsine. Kana malees, Teferi (2019, f. 105, 114) jechoota *duuda, danuu, 'abi* (*other*), *kiyya, keenynya, kee, 'isii* fi *keessan jedhaman* bamaqaalee jalatti ramadee ibsee jira. Haa ta'uu malee, jechoonni kunniin galumsa kennname keessatti tajaajila maqibsaafi gochibsaa kenuu (fkn. akkana kan '*isii*; '*isa kaan* dhawa; waan '*abi* hin beeku; *duuduma wajjiin*; *danuu* hin beektu).

Karaa biraatiin, fufii {-n} dhuma bamaqaa '*eenynyuuun* jedhamu irratti argamuuf Gragg (1976, f. 179), Teferi (2019, f. 112) fi Wakweya (2014, f. 44) hiika adda addaa kennanii jiru.

Isaanis, wal duraaduubaan maayii antimaa, maayii meeshaafi xiyyeefannoof kan tajaajilan ta'uu ibsanii jiru. Dabalataan, fufii {-umti} jedhamu Gragg (1976, f. 179) akka qaama tokkootti (fkn. *sun-umti*) xiyyeefannoofhaaf kan dhaabbatu ta'uu yemmuu ibsu, Teferi (2019, f. 84) garuu gargar qoqqooduun (fkn. *ana- uma-t-i-nuu*) ibsee jira. Hundaa ol, hanga qorataan kun sakatta'etti qorannoон hormaata bamaqaalee Afaan Oromoo looga Arsii irratti xiyyeefate hin jiru. Kanaaf, qorataan kun kaayyoo unkaalee hormaata bamaqaalee looga Oromoo Arsii adda baasuu kan jedhu irratti xiinxala gaggessee jira. Hojiin qorannoон kanaa ragaalee loogicha keessatti argaman irratti hundaa'uudhaan jechoota tajaajila bamaqummaa qaban adda baasuufi unkaa hormaata isaanii ibsuu irratti kan fulleffateedha.

Bu'aan qorannoон kanaa faayidaalee adda addaa ni qabaata jedhamee amanama. Isaan keessaa tokko, akaakuufi unkaalee hormaata bamaqaalee looga Oromoo Arsii galmeessee tursiisuun waaltina barnoota caasluga afaanichaatiif gumaachuu ni danda'a. Akkasumas, barattoota, barsiistotaafi qorattoota afaanichaatiif waa'ee unkaalee hortee bamaqaalee Afaan Oromoo looga Arsii beekumsa haaraa kennuu ni danda'a. Kana malees, qorattoota sadarkaa biyyaattis ta'ee

sadarkaa addunyaatti unkaalee hormaata bamaqaalee Afaan Oromoo afaanota biraa waliin dorgomsiisuu barbaadaniif akka ciicataatti ni gargaara jedhamee amanama. Dabalataan, bu'aan qorannichaa jechoota garee bamaqaalee jalatti ramadaman adda baasuudhaan qopheessitoota galmee jechootaafi barreessitoota seerluga Afaan Oromootiif akka galteetti tajaajiluu ni danda'a.

## **2. Sakatta'a Barruuwwanii**

Bamaqaan jecha bakka maqaa bu'uudhaan yeroo baay'ee unkaalee hortee maqaan tokko fudhatu kanneen akka lakkofsaa, koorniyaafi maayiwwan adda addaa fudhachuu danda'u dha (Crystal, 2008, f. 391; Shopen, 2007, f. 24). Afaan hundinuu jecha bakka maqaa bu'uudhaan akka maqaatti tajaajilu ni qaba (Dixon (2012, f. 190). Bamaqaaleen akaakuuwwan adda addaatti qoqqoodamuu ni danda'u. Isaanis bamaqaa namummaa, bamaqaa garagalchoo (reflexive), bamaqaa fuggisoo (reciprocal), bamaqaa akeektuu, bamaqaa mit-beekamaafi bamaqaa ibsamaati (Shopen, 2007, f. 24). Crystal (2008, f. 391–392) akaakuu bamaqaalee Shopen tarreesse keessaa bamaqaa fuggisoo hambisuudhaan bamaqaa iyyaafannoo immoo dabalee jira. Akkuma yaada hayyoota armaan olii irraa hubatamu, afaanonni addunyaa kana irra jiran

jechoota bakka maqaa bu'an akaakuu adda addaa ni qabu.

Qorannoowwan caasaa Afaan Oromoo irratti xiyyeffatan keessaa qabiyyee bamaqaalee kanneen hammatan muraasa. Qorannoowwan caasaa afanicha irratti hojjataman keessaa hojiiwwan Gragg (1976), Owens (1985) fi Stroomer (1995) gad fageenya haaqabaatuu dhabu malee, qorannoowwan caasluga afanichaatiif bu'uura kaa'anii jiru. Gragg (1976, f. 178-179, 191) bamaqaalee namummaa, akeektuu, iyyaafannoo, mit-beekamaa, garagalchoofi ibsaa jechuudhaan ibsee jira. Kana malees, Wakweya (2014, f. 35–46) akaakuu bamaqaalee afanicha namummaa, garagalchoo, fuggisoo, akeektuu, iyyaafannoo, mit-beekamoo jechuudhaan ibsee jira. Teferi (2019, f. 113) immoo qoranno looga Raayyaa irratti gaggesseen, akaakuun bamaqaalee afanicha namummaa, akeektuu, garagalchoo, fuggisoo, iyyaafannoo, abbummaafi mit-beekamoo jechuudhaan kanneen Wakweya irratti bamaqaa abbummaa jedhamu dabalee jira. Kana jechuun, Teferi'n bifa Wakweya (2014, f. 36) fi Stroomer (1995, f. 68) irraa adda ta'een jechoota *kiyya/koo, keenna, kee, keessan, isaa, isiifi isaanii* jedhaman garee bamaqaalee jalatti hammachiisee jira. Kana malees, Owens (1985,

f. 105) jechoota kanniin bamaqaalee abbummaa (possessive pronouns) jechuudhaan ibee jira.

Looga Oromoo Maccaa keessatti bamaqaan garagalchoo (reflexive pronoun) bamaqaa *ofii* jedhamuufi maqibsitoota abbummaa (*ofii koo, ofii keessanii, ...*) kan fayyadamu yemmuu ta'u, bamaqaan xiyyeffatamaan (intensive pronoun) immoo jecha *mataa* jedhamuufi maqibsitoota abbummaa (*mataa kootiin*) fayyadamu (Gragg, 1976, f. 179; Wakweya, 2014, f. 40-41). Haa ta'uu malee, akaakuun latiilee kanniini bamaqaalee looga Oromoo Arsii keessatti caasaa kanarraa adda ta'e hordofa.

Qorannoowwan kanaan duraa (Gragg, 1976, f. 179; Teferi, 2019, f. 114) keessatti gareen jechootaa tajaajila bamaqummaa osoo hin qabaatin garee bamaqaa jalatti hammataman ni jiru. Fakkeenyaaaf, Gragg (1976, f. 179) jechoota *biraa/kaan, kan biraafi hunda* jedhaman bamaqaalee keessatti hammachiisee jira. Kana malees, Teferi (2019, f. 114) jechoota *waan 'abi (other), danuu fi duudaa (hunda)* jedhaman bamaqaalee mit-beekamoo jalatti ibsee jira. Haa ta'uu malee, Dixon (2010, f. 74) jechoonni *biraa 'other', garii 'some', muraasa 'few', hunda 'all', tokkoffaa 'first', xumuraa 'last'* fi lakkofsonni garee maqibsaa jalatti ramadee jira. Kana malees, jechi *danuu jedhamu galumsicha* keessatti gochima faana

hiriiruudhaan tajaajila gochisaatiif dhaabbatee jira. Teferi (2019) bamaqaalee mit-beekamoo jechootatti (*waa, waan, wanna, homaa, 'abalufi baay'ee*) fayyadamuudhaan yemmuu ibsu, Wakweya (2014, f. 45) garuu, maxxantoota {-uu} (namuu) fi {-llee} ('eennullee) jedhaman gargaaramuun addeessee jira.

Akka qorattooni Afaan Oromoo hedduun jedhanitti, afaanicha keessatti bamaqaaleen baay'een akkuma maqaalee latiilee hortee adda addaa maxxanfachuu ni danda'u. Haaluma kanaan, Gragg (1976, f. 178), Owens (1985, f. 102), Teferi (2019, f. 104) fi Wakweya (2014, f. 36) akka ibsanitti, afaanicha keessatti bamaqaaleen namummaafi akeektuwwan hima keessatti iddo matimaa yemmuu galan unkaa matimummaa qabaachuu isaanii ibsanii jiru. Kana malees, akka qorattooni kunniin kaayanitti, unkaan bu'uuraa (base form) bamaqaalee namummaafi bamaqaalee akeektuu iddo antima kallattiitti mul'ata. Kana jechuun, unkaan dhaabbataan fufilee maayiwwan maqaaleefi fufii xiyyeffannoo maxxanfatu unkaa iddo antimaa galuu dha.

Qorattooni afaanichaa tokko tokko akka kaayanitti, afaanichi fufii maayii antimaa hin maxxanfatu. Karaa biraatiin, qorannoowwan akka agarsiisanitti, maqaaleefi bamaqaaleen dubbifamaafi dubbachiftuu gabaabaadhaan

xumuraman tokko tokko iddoor antimaatti fufii {-n} ni maxxanfatu. Kanarratti, ammayyuu yaada walfalmisiisatu mul'ata. Innis, yaada fufiin antima mul'isu jiraachuu deeggaruu (Gragg, 1976, f. 179; Haimanot, 1984, f. 19) fi yaada fufiin haala kanaan uumamu tajaajila biraatiif (xiyyeffannoo (Wakweya 2014, f. 28, 37) fi maayii meeshaatiif (Teferi, 2019, f. 85)) kan dhaabbatu ta'uu ibsuu dha. Fakkeenyaaaf, Gragg (1976, f. 179), Teferi (2019, 112) fi Wakweya (2014, f. 44) tajaajila fufii bamaqaa 'eenynyuuun jedhamu irratti argamu (-n) haala adda addaatiin ibsanii jiru. Haaluma kanaan, looguma Maccaa keessatti Gragg fufichi maayii aantimaa (accusative) ta'uu yemmuu ibsu, Wakweya'n immoo xiyyeffannoof kan dhaabbatu ta'uu kaayee jira. Teferi'n immoo xiinxala looga Raayyaa irratti gaggeesseen fufichi maayii meeshaatiif kan oolu ta'uu ibsee jira. Haata'uu malee, xiinxala kanniin keessatti bamaqaan iyyaafannoo ('eenynyu) kun ulaagaalee maaliin bamaqaalee biraa irraa akka adda ta'ee ibsi ragaalee afaanichaa bu'uuraffate hin kennamne.

### **3. Malleen Qorannichaa**

Qorannoon kun caasaa bamaqaalee afaanichaa ibsuu irratti waan fuuloeffatuuf, qorannoo ibsaa jalatti waamama. Karaa biraatiin, ragaaleen qorannichaa jechootaan kan ibsaman ta'uu

isaaniitiin saxaxa qorannoo akkamtaa hordofa. Ragaalee qorannichaa walitti qabuudhaaf madda ragaalee lamatu malaakkayootiin filatamee dhimma bahamee jira. Isaanis, kitaaba mata-duree 'Seera Fuudhaa-Heeruma Oromo Arsi'ii' (Huseen, 2000) jedhamuufi qoraticha qorannoo kanaati. Qoratichi hawaasa looga Arsii dubbatu keessatti kan dhalatee guddate waan ta'eef, madda ragaalee qorannichaa keessatti qooda fudhatee jira.

Kitaabichi qabiyyee aadaa hawaasichaa kanneen akka fuudhaafi heeruma, afoolaafi meeshaalee sirna fuudhaafi heerumaa dabaalan, aadaa soddoomaafi woyyoomaa, akkasumas sirna fixata gumaa fa'a kan hammatedha. Kana malees, akkuma barreessichi seensa kitaabichaa keessatti ibse, jechoonni aadaan hawaasichaa ittiin ibsaman guutumatti looga Arsii irratti kan xiyyeffate waan ta'eefi. Kanaaf, kitaabichi jechoota xabboo (jechoota aslii) aadaa hawaasichaa keessatti tajaajilaman waan hammatuuf, ragaalee looga hawaasichaa bakka bu'an maddisiisuu keessatti gahee olaanaa qaba jedhamee itti amanamee jira.

Ragaaleen maddeen garagaraarraa funaanaman qubeewwan afaanichi barreeffamoota kamiiniyyuu keessatti tajaajilamuun barreeffamuun qaacceffamanii jiru. Kanaaf, sagaleeleen dubbifamtootaa (qubee dachaafi

hudhaa dabalatee) yemmuu jabaatan lama ta'anii barreeffauudhaan tajaajilamanii jiru. Kana malees, seera caasaa keessoo (deep structure) afaanichaatiin jechoonni dubbachiiftuudhaan eegalan waan hin jirreef (Teferi, 2019; Tesfaye, 2015; Tilahun, 2018), jechoonni dubbachiiftotaan eegalaman hundinuu |' (hudhaa)dhaan dursiifamanii barreeffamanii jiru. Qorannicha keessatti amaloota irsaga (suprasegmental) dhamsagootaan hin ibsamne adda baasuuf unkaan ol ka'iinsa dhissagaa mul'isu (˘) tajaajilamee jira. Qabiyyeen qorannichaa ibsa akaakuu bamaqaaleefi caasaa fufiilee hortee walduraa boodaan hammatee jira.

#### **4. Qaaccessaafi Bu'aa Qorannichaa**

Gragg (1976, f. 179) jechoonni *bira/kaan, kan biraafi hunda jedhaman*, akkasumas Teferi (2019, f. 114) jechoonni *waan 'abi (other), danuufi duudaa (hunda)* jedhaman bamaqaalee mit-beekamoo jalatti kan hammataman ta'uun ibsanii jiru. Haata'u malee, jechoonni *danuu, 'abi, kaan, biraafi hunda jedhaman tajaajila maqibsaa kenu*. Kana malees, jechi *danuu jedhamu galumsicha keessatti gochima faana hiriiruudhaan tajaajila gochibsaatiif dhaabbatee jira*. Dixon (2010, f. 74) yaada kana ilaachisee jechoonni *bira, garii, muraasa, hunda, tokkoffaa, xumuraafi lakkofsonni garee*

maqibsaa jalatti kan ramadaman ta'uun ibsee jira.

Afaan Oromoo keessatti bamaqaaleen hundi akka maqaalee fufiilee hortee unkaadhaan kan maxxanfatan ta'uun baataniyyuu, unkaalee adda addaa lakkofsa, ramaddiifi maayii agarsiisan ni fudhatu. Kana jechuun, latileen bifaa maxxantuufi bifaa jecha of danda'eetiin dhaabbatanis ni jiru. Akkuma qorattooni afaanichaa tokko tokko (Gragg, 1976; Teferi, 2019; Stroomer, 1995; Wakweya, 2014) jedhan, unkaan bu'uuraa bamaqaalee irra caalaadhaan unkaa iddo antimaatti tajaajiluudha. Kana jechuun, fufiileen maayii abbummaa, fayyadamummaa, meeshaa, xiyyeffannoofi bakka aggarsiisan bamaqaalee iddo antimaa galan irratti maxxanu. Haa ta'uun malee, seerri kun bamaqaalee akeektuu, ibsamaafi mit-beekamaa ta'an tokko tokkoof addummaa qaba.

##### **4.1 Bamaqaalee Namummaa**

Wakweya (2014, f. 36) xiinxala looga Maccaa irratti gaggeesseen bamaqaaleen namummaa hundee jechootaafi maxxantoota qabaachuu ibsee jira. Innis, bamaqaaleen namummaa ramaddii tokkoffaa *naafi nu jedhamaniif hundeen n- yoo ta'u, ramaddii sadaffaa isa, iseefi isaan* kan jedhamaniif hundeen jechaa *ista'uun ibsuudhaan jijiiramoonni unkaalee irratti*

dabalataan dhufan danoomaafi maayii adda addaatiif kanneen dhaabbatan ta'uu ibsee jira. Haa ta'uu malee, kun, yaada hundeen jechaa hiika yaadrimee jechichaa qaba (Crystal 2008 f. 419; Fromkin, Rodman & Hyams, 2011, f. 86) jedhu ni faallessa. Kana malees, Dixon (2012, f. 58) afaanota baay'ee keessatti bamaqaalee namummaa irraa fufilee ramaddiifi laccoofsaan adda baasuun hin danda'amu jedha.

Looga Oromoo Arsii keessatti bamaqaan namummaa latilee laccoofsa, ramaddii, koorniyaa, maayii matimaafi maayii antimaa jecha of danda'aa fayyadamuun agarsiisa. Karaa biraatiin, akkuma gabatee armaan gadii keessatti dhiyaate, looga Oromoo Arsii keessatti bamaqaalee namummaa keessatti hundee jechaafi latilee laccoofsa, ramaddii, koorniyaa, maayii matimaafi maayii antimaa mul'isan adda baasuun hin danda'amu. Fakkeenyaaaf, unkaalee matimaafi antimaa mul'isan '*atiifi si'i* jedhaman hundee jechaafi maxxantuun gargar baasuun hin danda'amu. Sababiin isaa jecha tokko irraa hundeen yemmuu bahu, unkaaleen akka maxxantuutti irraa citan hiika dhaabbataniif qabaachuu qabu (Fromkin, Rodman, Hyams, 2011, f. 86; Crystal, 2008, f. 419).

Wakweya (2014, f. 36) matimni '*inni* jedhamu hundee *is-* jedhamuufi fufii matimaa {-n},

akkumas saagduu {-i} irraa ijaaramuu kaayee jira. Haata'u malee, adeemsa seera dhamsagoota afaanichaatiin hundeen jechaa |s|'dhaan xumuramu yemmuu {-n} maxxanfatu, amala firoommii osoo hin taane, amala walbaqannaagarsiisa (Gragg, 1976, f. 176; Stroomer, 1995, f. 24-26). Haata'u malee, akkuma loogawwan afaanichaa biroo keessatti ibsame (Owens, 1985; Stroomer, 1995; Teferi, 2019; Wakweya, 2014), looga Oromoo Arsii keessatti fufileen maayii meeshaa, abbummaa, fayyadamummaafi bakka agarsiisan bamaqaalee namummaa iddo antimaa dhaabbatan irratti maxxanu (Gabatee 1. armaan gadii ilaala). Haaluma kanaan, fufileen maayii abbummaafi fayyadamummaa mul'isu dubbachiftuu sagalee dheeraa (-TT) ti. Teferi, (2019, f. 104) jechi *kan* jedhamu bamaqaalee nama ramaddii tokkoffaa (*kan kee, kan keessan*) fi ramaddii sadaffaa danoomaa irratti maayii abbummaa kan bakka bu'u ta'uu ibsee jira ((*kan*) *isaanii*). Haata'u malee, gaaleewwan dhiyaatan kunniin gaalee maqaati. Sababiin isaa, mataan gaaleewwan kanneenii bamaqaalee harka bitaa irratti argamaniidha.

Kana malees, fufileen maayii meeshaa, bakka ka'umsaafi bakka ga'umsaa agarsiisan wal duraa duubaan -n/-iin, -TT fi -tidha. Bamaqaaleen namummaa maayii bakka ka'umsaa durduubeewwan bakka agarsiisuuf

dhaabbatan (*bira, 'irra, jala, duuba, keessa, gubbaa, 'afuu...*) irratti dubbachiiftuu sagalee dheeraa qabu dabalata. Bamaqaan '*isii* jedhamu durumaanuu dubbachiiftuu sagalee dheeraatiin waan xumuramuuf, maayii meeshaa yemmuu maxxanfatu, dubbachiiftuu dhumarrah gabaabsachuudhaan dubbifamaa kokkee (hudhaa), dubbachiiftuu sagalee dheeraafi {-n} dabalata ('*isii* + -n → '*isi iin*). Owens (1985, f. 107) maayii bakka ka'umsaa maxxantuu {-a} jedhamuun agarsiisee jira. Wakweya (2014, f. 39) fi Teferi (2019, f. 104) immoo jecha *irraa* jedhamuun bakka buusanii jiru. Haata'u malee, jechi '*irraa* jedhamu unkaa bu'uuraa '*irraa* jedhamu irratti fufii bakka ka'umsaa agarsiisu -TT (dubbachiiftuu sagalee dheeraa qabu) maxxanfatee jira. Fufiin maayii meeshaa {-n}

yemmuu bamaqaalee birsaga salphaadhaan xumuraman irratti galu, fufii qunnamsiiftuu (dubbachiiftuu sagalee dheeraa) of dursiisu. Stroomer (1995, f. 69) maqaaleefi bamaqaaleen fufii maayii meeshaa (-n) fudhachuun duratti latii qunnamsiistuu (linker) kan maxxanfatan ta'uu kaayee jira.

Karaa biraatiin, bamaqaan ramaddii sadaffaa qeenteen ('*isa*) latii maayii meeshaa of irraa qabuu ('*isaan*) fi bamaqaan ramaddii sadaffaa danoomaa ta'e ('*isāan*) ol ka'uu (stressed) fi gadi bu'uu (unstressed) dhissagaatiin gargar bahu. Bamaqaaleen maxxantuu maayii meeshaa fudhatan hundinuu birsaga jalqabaa irratti dhissaga ol ka'aa fudhatu. Gabateen armaan gadii bamaqaalee namummaa unkaalee horree isaanii hammatee jira.

### Gabatee 1. Unka Tajaajila seerlugaa Maayii Bamaqaalee Namummaa Looga Arsii Keessatti

Tajaajila Seerlugaa (Maayii)	Ramaddii 1 <sup>ffaa</sup>		Ramaddii 2 <sup>ffaa</sup>		Ramaddii 3 <sup>ffaa</sup>		
	Qeentee	Danuu	Qeentee	Danuu	Qeentee		Danuu
					Krm	Ny	
Matima	' <i>ani</i>	<i>nu/nu</i>	' <i>ati</i>	' <i>isin</i>	' <i>inni</i>	' <i>isiin</i>	' <i>isaan</i>
Aantima	' <i>ana/na</i>	<i>Nu</i>	<i>Si'i/si</i>	' <i>isin</i>	' <i>isa</i>	' <i>isii</i>	' <i>isaan</i>
Fayyadamummaa	' <i>anaa/naa</i>	<i>Nuu</i>	<i>si'ii/sii</i>	' <i>isinii</i>	' <i>isaa</i>	' <i>isii</i>	' <i>isaanii</i>
Meeshaa	' <i>anaan/naan</i>	<i>Nuun</i>	<i>si'iin/siin</i>	' <i>isiniin</i>	' <i>isaan</i>	' <i>isi'iin</i>	' <i>isaaniin</i>
Bakka Ka'umsaa	' <i>ana bira</i>	<i>nu</i> ' <i>irraa</i>	<i>si jalaa</i>	' <i>isin</i> <i>duubaa</i>	' <i>isa</i> <i>gubba'aa</i>	' <i>isii bira</i>	' <i>isaan</i> <i>bira</i>
Bakka Ga'umsaa	' <i>anatti/natti</i>	<i>Nutti</i>	<i>Sitti</i>	' <i>isinitti</i>	' <i>isatti</i>	' <i>isitti</i>	' <i>isaanitti</i>

Ibsa: Krm = Kormaa (Masculine); Ny = Naayee (Feminine)

Kana malees, unkaaleen latii xiyyeffannoo maqaalee irratti tajaajila kennan hundinuu bamaqaalee irrattis ni tajaajilamu. Haaluma kanaan bamaqaaleen namummaa latii xiyyeffannootiif firlatilee adda addaa tajaajila caasimaa agarsiisan ni gargaaramu. Unkaaleen bamaqaalee iddo matimaa irratti xiyyeffannoo agarsiisuuf galan {-tu}, {-umti}, {-ummaan} fi {-nuu} yemmuu ta'an, iddo aantimaatti immoo {-nuu} fi {-uma} dha. Unkaan {-nuu} iddo matimaafi antimaas galee tajaajiluu ni danda'a. Unkaaleen {-ummaan}, {-umtii} fi {-nuu} jedhaman bamaqaalee maayii matimaa qaban ('inni, 'isiin, 'isaan) ) irratti kan maxxanan yemmuu ta'an, {-uma}, {-nuu} fi {-tu} bamaqaa maayii antimaatiif dhaabbate { 'isa, 'isiin, 'isaan} irratti galanii jiru (Gabatee 2. ilaalaa).

Fufiin {-nuu}'n bamaqaalee birsaga salphaadhaan xumuraman irratti sagalee dubbachiiftuu kan

dheereffatu -TT (dubbachiiftuu sagalee dheeraa qabu) yemmuu ta'u, bamaqaalee birsaga cimaadhaan xumuraman irratti immoo -'TT (hudhaa-dubbachiiftuu-dubbachiiftuu) fudhata. Fufiin kun looga Maccaa keessatti jecha mataa jedhamuuifi maqibsitoota abbummaatiin bakka buufama (Wakweya, 2014, f. 40-41).

Unkaaleen {-ummaan} yookaan {-umti} jedhaman bamaqaalee iddo matimaa galan irratti waljijiiruudhaan tajaajilu. Fufiin {-uma} jedhamu yemmuu jecha birsaga salphaadhaan xumuramu irratti maxxanu, dubbachiiftun dhuma bamaqaa irratti argamu

ni haqama ('ana -uma → 'anuma). Faallaa kanaan, bamaqaan birsaga cimaadhaan xumuramu yemmuu {-uma} dabalatu, dhamsaga jalqaba fufichaa irratti argamu of jalaah qa (|u|). Adda addummaan galumsa fufiilee xiyyeffannoo kun Gabatee 2 armaan gadii keessatti bamaqaalee nama ramaddii sadaffaa fudhachuudhaan agarsiifamanii jiru.

## Gabatee 2 Fufiilee latii Xiyyeffannoo Bamaqaalee Namummaa Irratti

Bamaqaalee Sadaffaa		Ramaddii	-tu	-uma	-ummaan/ umti	-nuu
Qeentee	Matima	'inni/isiin	---	---	'innummaan	'inninuu/ 'isiinuu
	Aantima	'isa/isii	'isatu/ 'isitu	'isuma/ 'isima	---	'isaa/ 'isi'ii
Danuu	Matima	'isaan	---	---	'isaanumti	'isaanuu
	Aantima	'isaan	'isaantu	'isaanuma	---	'isaanuu

## 4.2 Bamaqaalee Akeektuu

Afaan Oromoo keessatti bamaqaaleen akeektuu yemmuu mataa gaalee maqaa ta'an (yemmuu kophaa dhaabbaatan) malee, maqaalee ibsuuf yemmuu galan garee maqibsaa jalatti waamamu (Teferi, 2019, f. 108). Akkuma yaada kanarraa hubatamu, akeektuuwwan yemmuu maqaalee faana hiriiran garee maqibsaa jalatti ramadamu.

Looga Oromoo Arsii keessatti bamaqaaleen akeektuu wantoota qaamaan mul'atan yookaan yaadaan jiran irratti hundaa'uudhaan bakka lamatti qoodamu. Isaanis, bamaqaalee akeektuu qaamaan mul'ataniifi qaamaan hin mul'annee dha. Bamaqaalee akeektuu qaamaan mul'atan kanneen wantoota nama dubbataa jiru biratti ijaan yookaan yaadaan mul'atan yemmuu ta'u, kanneen ijaan hin mul'anne immoo bamaqaalee wantoota kanaan dura irratti dubatamanii qalbii dubbatootaa keessa jiraniidha. Bamaqaaleen akeektuu latiilee hortee kanneen akka koorniyaa, danooma, xiqqeenna qaamaa yookaan tuffiifi maayiwwan ni agarsiisu.

Bamaqaaleen kunniin wanta (maqaa) dhiyeenya irratti argamu koorniyaa kormaafi naayee adda baasuudhaaf wal duraaduubaan unkaalee *kun/kanafi tun/tana* kan dhimma bahan yemmuu ta'u, wanta (maqaa) fageenya irratti argamu koorniyaa lamaaniifuu bamaqaa *sun* jedhamu fayyadamu. Unkaan aantimaa bamaqaa waan fagoo jiru bakka bu'u *sandha*. Fufiin danoomaa bamaqaalee akeektuu wantoota mul'ataniif dhaabbatanii {-iin} dha. Bamaqaaleen kunniin fufiilee xiyyeffannoo bamaqaaleen namummaa fudhatan hundumaa (Gabatee 2. ilaala) ni maxxanfatu. Kana malees, akkuma bamaqaalee namummaa latiilee abbummaa (-tt), fayyadumummaa (-TT), meeshaa (-n) fi bakka agarsiisan (-TT) *yookaan* (-tti) bamaqaa iddo antimaa galu irratti maxxanfatanii jiru. Fakkeenyawwan Gabatee 3 armaan gadii irratti dhiyaatan unkaalee hortee bamaalee akeektuu mul'isu.

**Gabatee 3.** Bamaqaalee Akeektuu Wantoota Qaamaan Mul'ata

Maayii Bamaqaa	Dhiyoo				Fagoo			
	Qeentee		Danoomaa		Qeentee		Danoomaa	
	Krm	Ny	Krm	Ny	Krm	Ny	Krm	Ny
Matima	<i>Kun</i>	<i>Tun</i>	<i>Kunniin</i>	<i>Tunniin</i>	<i>Sun</i>	<i>Sun</i>	<i>sunniin</i>	<i>sunniin</i>
Antima	<i>Kana</i>	<i>Tana</i>	<i>Kanniin</i>	<i>Tannin</i>	<i>San</i>	<i>San</i>	<i>sanniin</i>	<i>sanniin</i>
Fayyadamum maa	<i>kanaa</i>	<i>Tanaa</i>	<i>Kanniinii</i>	<i>Tanniinii</i>	<i>Sanii</i>	<i>Sanii</i>	<i>sanniinii</i>	<i>sanniinii</i>
Meeshaa	<i>kanaan</i>	<i>Tanaan</i>	<i>Kanniiniin</i>	<i>Tanniiniin</i>	<i>Saniin</i>	<i>Saniin</i>	<i>sanniiniin</i>	<i>sanniiniin</i>
BkKa	<i>kanaa</i>	<i>Tanaa</i>	<i>Kanniinii</i>	<i>Tanniinii</i>	<i>Sanii</i>	<i>sanii</i>	<i>sanniinii</i>	<i>sanniinii</i>
BkGa	<i>kanatti</i>	<i>Tanatti</i>	<i>Kanniintti</i>	<i>Tanniinitti</i>	<i>Sanitti</i>	<i>Sanitti</i>	<i>sanniinitti</i>	<i>sanniinitti</i>

**Ibsa:** Krm = Kormaa, Ny = Naayee, BkKa= Bakka Ka'umsaa, BkGa= Bakka Ga'umsaa

Gama biraatiin immoo loogicha keessatti bamaqaaleen akeektuu maqaalee qaamaan yookaan yaadaan waliin-dubbatoota bira hin jirre bakka bu'an koorniyaa kormaaf *kuun/kaan* yemmuu ta'an, koorniyaa naayeedhaaf *tuun/taan* dha. Isaanis, maqaalee dhala namaafi nammaleeyyi kanaan dura namoonni qalbii keessaa qaban akeekuuuf tajaajilu. Unkaan iddo matimaa *kuun/tuun* yoo ta'u, iddo aantimaatiif immoo unkaa *kaan/taan* jedhamutu tajaajilama. Bamaqaaleen kunniin fufii danoomaa {-wan} maxxanfatu. Akuma bamaqaalee biroo, bamaqaaleen kunniin fufiilee maayii abbummaa, fayyadamummaa, meeshaafi bakkaa fudhachuudhaaf bamaqaa maayii aantimaa akka unkaalee bu'uuraatti dhimma bahu. Fakkeenyaaaf, bamaqaan akektuu maayii

meeshaafi danooma agarsiisu *kaawwaniin* jedhamu yemmuu latiilee adda addaatti addaan qoodamee taa'u: *kaan –wan-ii-n* ta'a.

Latiin maayii bakka ka'umsaa sagalee dubbachiiftuu dheeraadhaan (-TT) agarsiifama. Haaluma kanaan, bamaqaaleen dubbachiiftuu sagalee gabaabaa dhuma irraa qaban kan dheereffatan yemmuu ta'u, kanneen dhuma irraa dubbifamaa qofa qaban immoo dubbachiiftuu /ii/ fayyadamu jechuudha. Bamaqichi durduubeewwan bakka (kallattii) agarsiisan karaa boodaatiin yoo dabalate, fuficha durduubeewwan sanniin irratti maxxanfata. Unkaan maayii bakka ga'umsaa agarsiisu {-tti} dha. Teferi (2019, f. 114) bamaqaa *kaan* jedhamu bamaqaalee mit-beekamoo (indefinite pronouns) jalatti ramaduudhaan ibsee jira.

### 4.3 Bamaqaalee Iyyaaffannoo

Bamaqaan iyyaafannoo maqaa namaafi wantoota nammaleeyyi bakka bu'uu ni danda'a. Looga Oromoo Arsii keessatti bamaqaaleen iyyaafannoo tajaajila gosa maqaalee bakka bu'anii irratti hundaa'uudhaan bamaqaa maqaa nama dhuunfaa, bamaqaa bakkaa, bamaqaa wantaa, bamaqaa filannoofi bamaqaa yerooti. Bamaqaaleen kunniin latiilee maayii adda addaa agarsiisan nimaxxanfatu. Bamaqaaleen iyyaafannoo '*eennu, maaliifi kam jedhaman latiilee maayii aantimaa, abbummaa, fayyadamummaa, meeshaa, bakka ka'umsaa, bakka ga'umsaafi bakka raawwii agarsiisan maxxanfatani jiru.*

Bamaqaalee '*eennu, 'eessaafi kam jedhaman irratti latiileen maayii abbummaafi fayyadamummaa sagalee dubbachiiftuu dheereffachuudhaan agarsiifamanii jiru. Latin maayii meeshaa agarsiisu {-n} yemmuu ta'u, bamaqaan dubbifamaadhaan xumuramufi dubbachiiftuu sagalee gabaabaadhaan xumuramu irratti laticha dursee wal duraa duubaan qunnamssiiftuu {-ii} fi sagalee dheeraa dubbachiiftuu dhuma dabalatu. Bamaqaaleen iyyaafannoo '*eennu, 'eessaafi kam jedhaman dhimma sammuu waliin dubbatootaa keessa jiru irratti hundaa'uudhaan haala galumsa waliin dubbii keessatti latii -tu maxxanfatani**

akka matimaatti dhaabbachuu nidanda'u. Yemmuu kana unki maxxane latii xiyyeffannoo yoo ta'u, matimul'istuun bifa dhokataa ta'een (Ø) hammatamee jira.

Akkuma gabatee 3 armaan olii keessatti mul'atu, bamaqaan iyyaafannoo yeroowwan adda addaa bakka bu'u hima keessatti akka matimaafi aantimaatti galee tajaajiluu waan hin dandeenyeef, yookaan immoo amala miiltuu gochimaa ta'uu qofa waan qabuuf latiilee maayii agarsiisan hin maxxanfatu. Jechi *yoom jedhamu* bamaqaa iyyaafannooti. Hornby (2010, f. 1755) jecha *yoom 'when'* jedhamu garee bamaqaalee jalatti ramadee kaaye. Jechi *yoom jedhamu* jechoota *yeroofi kam jedhaman irraa walitti suphamee ijaarame*. Haata'u malee, jechi '*akkam*' (Teferi, 2019, f. 112-113) jechoonni *yoomiifi akkam jedhaman fufii {-m}* jedhamu kan maxxanfate ta'uu kaayee jira. Jechi *yoom jedhamu* kun, caasaa himaa keessatti *yroo baay'ee miiltuu gochimaa waan ta'uuf, maayiwwan jechoonni garee maqaa kuuwwan fudhatan hin fayyadamu*. Kanaaf, bamaqaan kun maayii *yroo raawwii {-tti}* fi maayii *yroo ka'umsaa raawwii {'irra + -aa}* fayyadama.

Bamaqaaleen iyyaafannoo kunniin hundinuu latii hortee danooma agarsiisu {-fa'a} kan jedhamu maxxanfatu. Bamaqaalee iyyaafannoo

gabaticha keessatti dhiyaatan keessaan bamaqaan *kam* jedhamu maqaalee koorniyaa dhiiraafi koorniya-maleeyyiidhaaf tajaajilama. Bamaqaan waan tokko adda baafachuudhaaf tajaajilamu kun maqaalee koorniyaa naayee ta'aniifi tuffii yookaan xiqqueenya qaamaa agarsiisaniif *tam* kan jedhu gargaarama. Haata'u malee, bamaqaaleen iyyaafannoo haala caasaa himaa afanichaatiin iddo matimaa galuu waan hin dandeenyeef, unkaa matima agarsiisu hin fudhatan.

Akkuma kutaa sakatta'a barruuwani keessatti ibsame, waa'ee fufii maayii aantimaa irratti yaadota wal mormaa ta'antu jiru. Haa ta'u malee, bamaqaaleen maqaa nama dhuunfaa bakka bu'an, kanneen dubbifamaadhaan yookaan birsaga salphaadhaan xumuraman fufii maayii aantimaa {-n} maxxanfatu. Owens (1985, f. 101) maqaaleen nama dhuunfaa amala kana qaban (Kadija, Hasan) haala adda ta'een matimul'istuu kan hin maxxanfanne ta'uu ibsee jira (*Kadija ni dhufte*). Gabateen 4 armaan gadii bamaqaalee iyyaafannoofi latiilee hortee isaan fudhachuu danda'an hammatee jira.

#### Gabatee 4. Latiilee Maayii Bamaqaalee Iyyaafannoo Irrattii

Latii Maayii Maqaalee	Bamaqaalee Iyyaaffannoo			
	'eennu	Maal	'eessa	kam/tam
Matimaa	---	---	---	---
Antimaa	-n	Ø	---	-n
Abbummaa	-uu	-ii	-aa	-ii
Fayyadamummaa	-uu	-ii	---	-ii
Meeshaa	-n	-n	---	-n
Bakka Ka'umsaa	-(')TT	-(')TT	-(')TT	-(')TT
Bakka Ga'umsaa	-tti	-tti	-tti	-tti
Bakka Raawwii	-tti	-tti	-tti	-tti

Ibsa: -TT (-VV) = dubbachiiftuu-dubbachiiftuu (Sagalee dubbachiiftuu dheeraa)

#### 4.4 Bamaqaalee Mit-beekamoo

Bamaqaalee mit-beekamoob bamaqaalee maqaaleen isaan bakka bu'an adda hin

baaneedha. Isaanis, bamaqaalee maqaa nama dhuunfaa, wantootaafi bakkaati. Looga Oromoo Arsii keessatti jechi 'ebalu (Krm)

yookaan 'ebalee (Ny) jedhamu bamaqaa maqaa nama dhuunfaa bakka bu'uyemmuu ta'u, jechoonni waa, wanna (wonnoo) fi homa jedhaman yeroo baay'ee maqaalee nammaleeyyi bakka bu'uun tajaajilu. Loogicha keessatti bamaqaan *homa* (everything) jedhamu fufii {-llee} fi {-uu} jedhamuun bakka buufamuu ni danda'ama (*namuu*, 'eessallee). Owens (1985, f. 192) bamaqaa *homa* jedhamu *maxxantuu* {-ayyuu} (*namayuu gaafadhdhe* "I asked everyone") jedhamuun yemmuu bakka buusu, Wakweya (2014, f. 45). immoo maxxantoota {-uu} (*namuu* (noboy)) fi {-llee} ('eessallee (wherever)) jedhamaniin bakka buusee jira. Bamaqaan nama dhuunfaa ('ebalu/'ebalee) ramaddii nama sadaffaa qofaaf dhimma bahama. Kana malees, loogicha keessatti bamaqaan '*ugur* jedhamu iddo (biyya) maqaa hin dhahamin bakka bu'uuf tajaajila. Akkuma Gabatee 4. armaan gadii keessatti dhiyaate, bamaqaaleen *wanna*, *wonnoo*, *waafi homaa* jedhaman latiilee maayiwwan abbummaa, fayyadamummaa, meeshaafi bakka agarsiisan ni maxxanfatu. Bamaqaalee kanniin keessaa *wonnoo* (wanna) kan jedhamu fufii maayii matimaa {-n} yoo maxxanfatan, *homa*, *waafi homaa* kanneen jedhaman iddo matimaa galuu hin danda'an. Asirratti, bamaqaaleen *wanna* (*wantaa*) fi *waan* jedhaman bamaqaalee *wanna* (*wonnoo*)

jedhaman irraa kan adda ta'aniin, ibsitoota (relative clause) kan barbaadan waan ta'aniifi (Gabatee 7. ilaala). Bamaqaan *wonnoo* jedhamu fufilee danoomaa {-olee} fi addiraa beekamummaa {-ichcha} jedhamu ni maxxanfata.

Loogicha keessatti bamaqaaleen maqaa nama dhuunfaa bakka bu'anakkuma bamaqaan iyyaafannoo '*eennu* jedhamu (Gabatee 4. ilaala) maqaa nama dhuunfaatiif dhaabbatuu, haala adda ta'een fufii maayii aantimaa ni maxxanfatu. Haaluma kanaan, bamaqaan birsaga salphaadhaan xumuramu ('ebalu) fufii qunnamsiistuu {-uu} dursiisuudhaan fufii maayii antimaa {-n} dabalatee jira. Karaa biraatiin, bamaqaan kun iddo matimaatti latii dhokataa fayyadama. *Ugur* jechuun bakka wohii (bakka maqaan adda hin bane) jechuu dha. Bamaqaan '*ugur* jedhamu iddo (biyya) maqaa hin dhahamin bakka bu'ee tajaajila (fkn. Gurbichi *ugur* imale). Kana malees, bamaqaan *homa* (whatever/any) jedhamu loogicha keessatti birsgaga dhuma yoo dheereffate (*homaa*), hiika waan tokkoyyuu (*nothing*) jedhamu qabaata. Innis, hima hi'eentaa keessatti qofa iddo aantimaa galee tajaajila. Gragg (1976, f. 179) bamaqaa kana (*homaa*) jecha *homaa* (none) jedhamuun yoo bakka buusu, Owens (1985, f. 192) iddo bamaqaa *homa* jedhamu *maxxantuu* {-ayyuu}

(namayyuu gaafadhdhe “I asked everyone”) latiilee maayii maqaalee isaan faana galan jedhamuun bakka buusee jira. Gabateen 5 agarsiisa.  
armaan gadii bamaqaalee mit-beekamoofi

### Gabatee 5 Bamaqaalee Mit-beekamoofi Maayiwwan Isaanii

Maayiwwan Maqaalee	Bamaqaa Maqaa Nama Dhuunfaa		Bamaqaa Bakkaa	Bamaqaa Wantootaa
	Kormaa	Naayee		
Matima	'ebalu-Ø	'ebalee-n	----	wanna(wonnoo) -n
Aantima	'ebalu-uu-n	'ebalee-Ø	'ugur	wonnoo -Ø/waa -Ø, homa-Ø, homaa-Ø
Abbummaa	'ebalu-uu	'ebalee-'ee ('ebale'ee)	---	wanna'aa
Fayyadamummaa	'ebalu-uu	'ebalee-'ee ('ebale'ee)	---	waa -ii(f), wanna-'aa, homaa
Meeshaa	'ebalu-uu-n	'ebalee-'een ('ebale'een)	'ugur-ii-n	waa -ii-n, homa-aa-n
Bakka Ka'umsaa	'ebalu+'irra-aa	'ebalee + bira-aa	'ugur-ii	waa/homa + jala-aa
Bakka Ga'umsaa	'ebalu-tti	'ebalee -tti ('ebaletti)	---	waa -tti, homa -tti

Ibsa: Bm = Bamaqaa, Krm = Kormaa, Ny = Naayee,

#### 4.5 Bamaqaalee Garagalchoofi Fuggisoo

Bamaqaan garagalchoo (reflexive pronoun) matimni hima tokkoo garagalee iddo antimaatti yemmuu bakka buufamuu dha. Bamaqaan garagalchoo gaalee maqaa caasaa himaa keessatti deebi'ee matima bakka bu'uu dha (Shopen, 2007, 177). Bamaqaan fuggisoo qaamonni lamaafi lamaa ol ta'an raawwii gita tokko qabu walii isaanii jiddutti raawwachuu kan agarsiisuu dha.

Looga Oromoo Arsii keessatti unkaaleen bu'uuraa bamaqaalee garagalchoofi fuggisoo wal duraa duubaan 'ufifi wal dha. Bamaqaaleen fuggisoo fi garagalchoo yemmuu himni tokko gochima ceaa garaaramu kan mul'atan yemmuu ta'u, iddo aantimaa qofatti galuu danda'an. Bamaqaaleen kunniin akkuma Gabatee 5 keessatti kaayame, unkaalee bu'uuraa isaanii ('uf, wal) irratti latiilee maayii abbummaa fi fayyadamummaa (-ii), maayii meeshaa (-n) fi maayiwwan bakkaa (-ttifi -TT)

jedhaman maxxanfatanii jiru. Bamaqaan fuggisoo caasaa himaa keessatti iddo matimaa irraa kan hafe bakka hundaa galee ni tajaajila. Fakkeenyaaaf, bamaqichi yemmuu maayii meeshaa maxxanfatu, jalqaba qunnamsiiftuu {-ii} erga dursiiseen booda fuficha (-n) maxxanfata (4.1 ilaala) jechuudha. Hima *Isaan waliin bara bayan* jedhamu keessatti namoonni lamaanuu walitti fayyadamanii yookaan walitti irkatanii bara rakkoo sana keessa darban hiika jedhamu qaba. Wakweya (2014, f. 46) hima *Marartuu-fi Immiruu-n walii-n jiraat-u* jedhamu keessatti fufiin bamaqaa fuggisoo irratti maxxane (-n), jecha *wajjiin* jedhamu irraa

kan gabaabsameefi maayii bakkaa kan agarsiisu ta’uu kaayee jira. Haata’uu malee, bamaqichi akkuma bamaqaalee biroo fufii maayii meeshaa (-n) maxxanfatee jira. Teferi (2019, f. 108) bamaqaa fuggisoo yemmuu inni unkaa bu’uraatiin dhaabbaatu, gochimootatti hidhuudhaan (*wal-barbaad-Ø-u*) barreesse. Haata’u malee, *waliifi ’uf* bamaqaalee walabaa ti. Sababiin isaa lamaanuu unkaalee bu’uraa fufilee addaa irratti maxxanfatan ni qabu. Gabateen 6 armaan gadii bamaqaalee garagalchoofi latiilee hortee maayii maqaaleetiif oolan hammatee jira.

#### Gabatee 6. Bamaqaalee Garagalchoofi Bamaqaalee Fuggisoo

Maayiiwan	'uf	Fakkeenyaa	Wal	Fakkeenyaa
Matima	---			---
Antima	Ø	<i>Inni uf arge.</i>	Ø	<i>Aniifi Gammado wal argine.</i>
Abbummaa	-ii	<i>Inni qooda ufti fudhate.</i>	-ii	<i>Jarri qalbii walii hin cabsan.</i>
Fayyadamummaa	-iif	<i>Inni uftif dubbate.</i>	-ii(f)	<i>Isaan ameessa walii dabarsan.</i>
Meeshaa	-n	<i>Inni uftiin na hin waamu.</i>	-n	<i>Isaan lachuu waliin bara bayan.</i>
Bakka Ka’umsaa	<i>irra-aa</i>	<i>ufirraa na darbe</i>	<i>irra-aa</i>	<i>Isaan baallii walirraa fuudhan.</i>
Bakka Ga’umsaa	-tti	<i>uftitti waame</i>	-tti	<i>Nuti jaarsota walitti waamne.</i>

#### 4.6 Bamaqaa Bakkaa

Bamaqaan bakkaa akkuma moggaasa isaa maqaa biyyaa yookaan maqaa iddo bakka

bu’aa. Looga Oromoo Arsii keessatti bamaqaalee bakkaa kan jedhaman ’asiifi ’achchi yemmuu ta’u, bamaqaa bakkaa ’ugur

jedhamu irraa wanti adda taasisu, iddoobEEKAMU (mul'atu) tokko kan akeekan ta'uuisaaniiti. Bamaqaalee kanniin keessaa 'as kan jedhamu iddoob Dhiyoo ta'e kan bakka bu'u yemmuu ta'u, 'achchi kan jedhamu immoo iddoob fagoo ta'e bakka bu'a. Dixon (2010, f. 228) "In English there is an obvious referential connection between this and here and between that and there. This can lead to a temptation to define the adverbial demonstratives in terms of the nominal ones, or vice versa" jedha. Akkuma yaada kana irraa hubatamu, bamaqaan kun iddoob wohii akeekuu isaatiin amala bamaqaalee akeektuu *kanaafi san* jedhamanii ni qooddata.

Loogicha keessatti bamaqaaleen bakkaa iddoomatimaa galanii hin tajaajilan. Bamaqaaleen kunniin latiilee maayiwwan meeshaa, abbummaa, fayyadamummaafi bakka agarsiisan akkuma bamaqaalee akeektuu ni maxxanfatu. Fakkeenyaaaf, himoota gabatee armaan gadii keessatti 'Kana as kaa'i' fi 'Kana achchi geessi' jedhaman keessatti 'asiifi 'achchi kan jedhaman maqaa iddoob adda baafame tokkoo bakka bu'anii tajaajlanii jiru. Bamaqaaleen kunniin maayiwwan abbummaa, meeshaafi bakkaa agarsiisuuf akkuma bamaqaalee kaawwanii maxxantoota fudhatanii jiru. Gabatee 7 armaan gadii bamaqaalee bakkaa unkaalee hortee waliin dhiyeessee jira.

#### Gabatee 7. bamaqaalee bakkaa fi unkaalee hortee isaanii

Maayii Bamaqaa	Iddoo Dhiyoo	Fakkeenyaa	Iddoo Fagoo	Fakkeenyaa
Matima	---	---	---	---
Aantima	'as	Ati <i>as</i> laali	'achchi	Ati <i>achi</i> laali.
Fayyadamummaa	---	---	---	---
Abbummaa	'asii	aadaa <i>asii</i>	'achchii	aadaa <i>achii</i>
Meeshaa	'asiin	Nu'u <i>asiin</i> karaa gabaabsanna.	'achchiin	Isaan <i>achiin</i> nu afoo bahan.
Bakka Ka'umsaa	'as-ii	Ani <i>asii</i> ba'ee si hin hamadhu.	'achchii	Isaan <i>achii</i> nu waaman.
Bakka Ga'umsaa	'as	Kana <i>as</i> kaa'i.	'achchi	Kana <i>achi</i> geessi.

#### 4.7 Bamaqaa Ibsamaa

Bamaqaan ibsamaan (relative pronoun) bamaqaa yeroo maraa ibsituu of duubaan fudhatuu dha. Payne (1997, f. 325) Keenan (1985) wabeeffacuudhaan, “A relative clause is one that functions as a nominal modifier” jedha. Akka yaada kanarraa hubatamutti, bamaqaa ibsamaan ciroo irkataadhaan ibsama. Gaaleen bamaqaa ibsamaadhaan ijaaramu ciroo hirkataa akka miseensaatti haahammatu malee, mataan gaalichaa maqaa (bamaqaa) dha (Payne, 1997, f. 325-326).

Looga Oromoo Arsii keessatti bamaqaan ibsamaan jechoota *waan*, *wanta*, *wannaafi ka/ta* jedhamaniin bakka buufamu. Bamaqaa ibsamaa keessatti ibsitooni ciroo irkataa gaalee gochimaa irraa ijaaramu yookaan jechoota garee maqibsaa ta’uu danda’u. Bamqaalee kanniin keessaa *ka* yookaan *ta* maqaalee dhala namaafi maqaalee dhala nama hin taaneef bakka bu’uu ni danda’u. *Ka’n* maqaalee koorniyaa kormaafi koorniya-maleeyyiif kan dhaabbatu yoo ta’u, *ta’n* immoo koorniyaa naayee, tuffiifi xiqqenya agarsiisuuf tajaajilu. Bamaqaan *ka/ta* jedhamu maayii matimaa unkaadhaan hin maxxanfatu. Kana

malees, bamaqaan kun akka bamaqaalee *waan*, *wanta*, *wannaafi warra* jedhamanii maqibsitoota qofaa isaanii akka ibsituutti miilteffachuu hin danda’u (fkn. \**ka diimaa*, \**ka guddaa*, *waan diimaa*, *wanta guddaa*) (Gabatee 8 ilaala). Bamaqaan *warra* jedhamu maayii matimaa {-i} fayyadamee jira. Haa ta’uu maelee, maqaleefi bamaqaalee adda addaa miilteffachuudhaan mataa gaalee maqaa ta’uu ni danda’u. Fakkeenyaaaf, mammaaksaa “Sareen *ta uffi* hin argituu, re’een eegee gad qabadhu jetti” jedhamu keessatti *ta’n eegee* bakka bu’ee jira.

Kanaaf, bamaqaaleen *waan*, *wanta*, *wannaafi warra* jedhaman ciroo ibsaa, ciroo ibsaatiifi akeektuu, akkasumas jecha maqibsaa qofa miilteffachuu ni danda’u. Gabaabumatti, bamaqaan ibsaa kun ciroo maqaa ibsuun waan hordofamuuf, latiilee hortee maayii adda addaa qaban bifuma bamaqaalee birootiin dhuma ciroowwanii irratti dabalata (Gabatee 8 ilaala). Gragg (1976, f. 191) looga Maccaa keessatti jechootni *kan*, *waan*, *warraafi jara* jedhaman bamaqaa ibsamaa bakka bu’uu kan danda’an ta’uu ibsee jira.

**Gabatee 8.** Unka Hormaataa Bamaqaa Ibsamaa

Maayii Maqaalee	Caasaa Ibsamaa	Bamaqaa	Fakkeenya
Matima	<i>BmIbsm + Ciroo Ibsaa</i> (MI)+ -i(Ø)	<i>Ka intala fuudheefi ta intala itti heerumsiifte waliif woyyu'u. Jaarsonni, warri nama araarsu hin dhufne.</i>	
Antima	<i>BmIbsm + Ciroo Ibsaa</i> (MI)+ Ø	<i>Ati ka/wanta/ wanna/ waan argatte quсадhu! Ati warra beekkumsa qabu waami.</i>	
Abbummaa	<i>BmIbsm + Ciroo Ibsaa</i> (MI)+ -TT	<i>Ati fuula ka si jibbuu maa laalta? Jireenni warra walii galee milkii qaba.</i>	
Fayyadamu mmaa	<i>BmIbsm + Ciroo Ibsaa</i> (MI)+ -TT	<i>Inni lafa ka isatti soddoomee kenna. Inni horii warra intala fuudhuu kenne.</i>	
Meeshaa	<i>BmIbsm + Ciroo Ibsaa</i> (MI)+ -n	<i>Ani waan ati naa kenniteen uffata bitadhe. Inni wanta gudda'aan na darbate. Namichi warra loon qabuun dhaadata.</i>	
Bakka Ka'umsaa	<i>BmIbsm + Ciroo Ibsaa</i> (MI) + irra-aa ('irraa)	<i>Inni qarshii ka ati waamte irraa fudhate. Boruun warra mucattii fuudhu irraa gabbara fudhate.</i>	
My Bakka Ga'umsaa	<i>BmIbsm + Ciroo Ibsaa</i> (MI)+ -tti <i>gara BmIbsm + Ciroo Ibsaa</i> (MI) + -TT	<i>Inni qarshii ka ati waamtetti kenne. Inni qarshii gara ka ati waamtee hiixate. Inni qarshii warra ati waamtetti kenne. Inni qarshii gara warra ati waamtee hiixate.</i>	

Ibsa: Ibsm = Ibsamaa, Krn = Koorniyaa, -TT (-VV) = dubbachiiftuu-dubbachiiftuu,

## 5 Goolaba

Looga Oromoo Arsii keessa bamaqaaleen akkaataa tajaajila walitti dhiyeenyaa qabaniin bamaqaalee namummaa, bamaqaalee akeektuu, bamaqaalee iyyafannoo, bamaqaalee mit-beekamoo, bamaqaa walii, bamaqaa ufiifii, bamaqaalee bakkaafi bamaqaalee ibsaa jedhamu.

Bamaqaalee namummaa irratti unkaalee hortee kanneen akka danoomaa, ramaddii, maayii matimaafi maayii aantimaa adda baasuun hindanda'amu. Bamaqaalee namummaa keessatti maayiwwan kunniin bifaa jechaatiin agarsiifamu. Fakkeenyaaf, danoomaaf 'ati/isin, ramaddiiif ati/si'i, matimaaf ani/ati/inni kanneen jedhamanii wal duukaa jiran keessatti

hundee murteessuun hin danda’amu. Kana malees, bamaqaaleen akeektuu (kun/sun, kana/san, bamaqaleen mit-beekamoo (*’ebalu/’ebalee*) fi bamaqaaleen iyyaafannoo (*kam/tam*) agarsiistuu latii koorniyaa {k/-t-} fi {-u/-ee} fudhachuudhaan adda baasu. Bamaqaaleen kunniin latilee danoomaa, latilee xiyyeffannoofi latilee maayiwwan abbummaa, fayyadadamummaa, bakkaa ni maxxanfatu. Bamaqaaleen ibsamaa (*ka, ta, warra*) ciroo irkataadhaan waan hordofamuuf, latileen xiyyeffannoofi maayii adda addaa mul’isan dhuma gaalee gochimichaa irra galu (*ka intala fuudhutu...*). Kana malees, bamaqaaleen iyyaafannoo (*’eennu, maal, ’eessa, kam/tam*) maayii matimaafi koorniyaa irraa kan hafe maayiwwan maqaalee kanneen hafan hundumaa nifudhatu. Bamaqaan *kamiifi tam jedhaman garuu, koorniyaa kormaafi naayee, akkasumas xiqqeinyaafi guddina qaama wanta tokkoo agarsiisuuf gargar bahanii jiru.*

### **Wabiilee**

Chambers J. K. & Trudgill P. (2004) *Dialectology* (2nd Ed) Uk. Cambridge University Press.

Crystal, D. (2008). A dictionary of linguistics and phonetics (6<sup>th</sup> ed.). UK: Blackwell.

Feda Negessa. (2015). Classification of Oromo dialects: A computational approach. *International Journal of Computational Linguistics (IJCL)*. 6(1), (1-10).

Haimanot Moges (1984). *The Pronouns and Pronominalization in Oromo*. Addis Ababa University. Addi Ababa, (Unpublished Senior Essay, BA).

Hawine Alemayehu. (2007). *The Structures of Nominal Clauses in Afan Oromo: A Minimalist Approach*. Addis Ababa University: Addis Ababa.

Hornby A. (2010). *Oxford Advanced Learner’s Dictionary*. New York: Oxford University Press.

Kebede Hordofa. (2009). Towards the genetic classification of the Afaan Oromoo dialects (Unpublished PhD Dissertation), University of Oslo.

Keenan, Edward L. 1985. Relative clauses. In *Language Typology and Syntactic Description*, vol. II: Complex Constructions, ed. by Timothy Shopen, 141-70. Cambridge University Press.

Owens, J. (1985). *A grammar of Harar Oromo*. Hamburg: Buskee.

Shimelis Mezengia. (2014). Nominalization via verbal derivation Amharic, Tigrinya and

Oromo (A contrastive study) (Unpublished PhD thesis), Addis Ababa University, Addis Ababa, Ethiopia.

Shopen, T. (2007) (Edited). Language Typology and Syntactic Description. Cambridge University Press, New York.

Stroomer, H. (1995). A Grammar of Boraana Oromo (Kenya). Cologne: Rüdiger Köppe Verlag.

Teferi Kumsa. (2019). A Grammar of Raya Afaan Oromoo: Documentation and

Description (Unpublished PhD Dissertation). Addis Ababa University.

Tesfaye Gudeta. (2015). “Typology of Oromo Personal Names”; In International Journal of Sciences, Vol.19 (2), (17-34).

Wakweya Olani. (2014). Inflectional Morphology in Oromo. MA Thesis (Unpublished) Addis Ababa University, Ethiopia.